

義門記

江州陳氏宗族繁盛衣冠濟義和氣藹於門庭淳風彰於邦國按其宗譜乃陳宜都王叔明之後五世孫兼唐元宗開元十六年舉進士及第官贈秘書少監爲右補闕仍畱翰林院生京官至結事中集賢院學士乏嗣以從子褒爲子官至監官令生灌爲高安縣丞其後子孫鏞諱伯宣者隱處廬山注司馬遷史記行於世詔徵不起生檀檀生旺居德安縣太平鄉長樂里旺生機機生感感生蘭蘭生青青生伉仲侍俛偉伸六子生孫十七十七又生三十四白是家益昌

族益熾矣至伸之孫崇端數世未嘗分異益置田園爲家法戒子孫擇羣從以掌其事建書堂以教誨之其家法序曰我家襲秘監之累功承著作之貽謀代傳孝弟上下和睦但子孫之眾多不無智愚之或異苟無董率之條恐乖敦睦之義今設之以局務垂之以規程推功任能懲惡勸善必令子孫世守家規永蹈和睦云云爰立主事以專家政置庫司以掌家財立莊長以督賦租學院以教童稚道院以業焚修巫法以備祈禱醫師以供藥石東佳書院以待學者德宇廨宇以奉公門其餘酒漿鹽米之儲衣裳笄箱之

具三時飲食之節四序宴會之期長幼出入之儀晨昏定省之禮婚姻弔喪送往迎來賞以勸善罰以懲惡凡諸纖悉莫不周詳其於臧獲不入於門鷹犬不以爲玩天文圖緯之學縱橫權變之謀佛圖桑門之言商賈營販之利禁之不習室無私財廚無異饌大小知教內外如一唐僖宗聞其事詔旌其門南唐又爲之立義門免其徭役崇子衮衮子昉端子聚聚子英仲九世同居長幼凡七百口不畜婢妾人無閒言每食必羣坐廣堂未成童者別爲一席有犬百餘其一牢食一犬不至羣犬亦皆不食建書樓以延四方

之士鄉里率化唐知州上其事詔仍免其徭役至競
之世子孫益眾嘗苦乏食涪化初殿中丞唐戩知江
州事奏陳氏一家骨月千口饑貧難濟詔本州每歲
貸粟二千石其後競死從弟旭止受貸粟之半云省
嗇而食可以及秋成熟歲歉粟貴或勸旭全受而糶
可邀善價旭曰朝廷以旭家羣從千口賑其乏食貸
以公粟豈可見利忘義耶帝聞深加歎獎至道中太
宗遣內侍裴愈賫御書散江表三吳名山寺觀德義
之家皆賜一本陳氏所得凡三十三卷藏之家於愈
復上陳氏家法二篇太宗覽畢嘆曰眞良家也愈言

陳氏每歲貸粟四千餘斛距江州二百餘里舟楫不通嘗費二千餘斛腳值若就德安縣倉庫給發以免車馬驛料則天恩加惠義門者厚矣太宗許之自是省費官民稱便夫陳氏始以二百人而家法行三百口而義門立開寶之初共計七百四十口咸平三年增至一千四百七十八口春秋傳曰五世其昌並於正卿八世之後莫之與京自旺至青五世矣至袞八世矣袞立義門昉主家政三十五年由昉以下俱擅詞場文學之英才也均受官職衣官之榮耀也斯五世而昌八世而大非獨陳完之在齊矣天地一氣也

萬民一姓也政教一體也而爲清爲濁爲善爲惡顧亦有不同者以予觀陳氏之宗則皆清而純善而和義而正蓋才不矜技不術清純者也富不驕貧不怨善和者也義門之稱洵不欺也天兵之討江州陳氏昆弟七人在圍中及賊破軍民殺傷殆盡七人異處全歸一無所傷義之感也至道以來仍歲饑荒陳氏舉宗啜粥雜以藻菜怡然相安義之至也余與太常博士陳君靖相善有年嘗覽陳氏世譜閱家法詢事實具知其狀因爲之記並繫之辭曰 累仁積德其後必昌煜煜陳宗文風克颺家法堪式義門表德旌

表在上示爲法則尙義則崇尙利則窮伊維陳宗世
襲淳風在昇及煜猶然敦勛逮我聖宗恩惠駢屬聖
宗萬年子孫億千德澤旁流福壽緜緜

時

大宋己亥春月吉日

翰林院學士王禹偁撰